

16 SEP 1997

MALAYSIA AKAN BANGKITKAN ISU PASARAN SAHAM DAN MATAWANG DI CHOGM

KUALA LUMPUR, 16 Sept (Bernama) -- Malaysia akan membangkitkan persoalan mengenai pasaran saham dan matawang pada Mesyuarat Ketua-ketua Kerajaan Komanwel (CHOGM) di Edinburgh, Scotland.

Perdana Menteri, Datuk Seri Dr Mahathir Mohamad yang akan menghadiri mesyuarat itu, akan turut memperkatakan tentang manipulasi mata wang.

Perkara tersebut dinyatakan oleh Perdana Menteri pada perbincangannya dengan Presiden Sri Lanka Chandrika Kumaratunga di Pejabat Perdana Menteri hari ini.

Kumaratunga tiba semalam untuk lawatan rasmi empat hari atas undangan Yang di-Pertuan Agong Tuanku Ja'afar dalam usaha meningkatkan hubungan dua hala serta memperluaskan kerjasama ekonomi.

"Perdana Menteri memberikan pandangannya bagaimana manipulasi matawang telah menyebabkan kesusahan kepada negara-negara sedang membangun dan meningkat maju...pengalaman yang dirasai oleh Malaysia dalam perkara ini telah dijelaskan," kata Menteri Luar Datuk Seri Abdullah Ahmad Badawi.

"Presiden Sri Lanka telah memberikan pandangannya yang menunjukkan bahawa beliau memahami apa yang berlaku dan ada persetujuan mengenai perkara ini," katanya kepada pemberita selepas pertemuan itu.

Abdullah berkata Kumaratunga menyatakan bahawa Sri Lanka akan mencadangkan supaya Malaysia menganggotai kumpulan 24 (G24) memandangkan ada satu kekosongan anggota pada waktu ini.

Kumpulan itu dianggotai oleh 24 negara pada peringkat ketua bank pusat masing-masing yang berperanan khusus membincang perkara-perkara berkaitan kewangan.

Dr Mahathir telah menyatakan bahawa Malaysia akan mengkaji cadangan itu.

Menurut Abdullah, Kumaratunga turut menyatakan kepada Dr Mahathir mengenai hasrat Sri Lanka untuk menganggotai forum Kerjasama Ekonomi Asia-Pasifik (APEC).

Dr Mahathir berkata pada masa ini belum ada keputusan memperluaskan keanggotaan APEC tetapi apabila tiba masanya Malaysia boleh memberi sokongan kepada hasrat Colombo itu.

Mengenai isu hak asasi manusia, Abdullah berkata Dr Mahathir menjelaskan mengenai pandangan Malaysia dan Presiden Sri Lanka itu menyatakan ada alasan untuk mengkaji semula Deklarasi Hak Asasi Manusia Pertubuhan Bangsa-bangsa Bersatu.

"Ini bermakna ada sokongan dari Sri Lanka terhadap usaha yang akan dilaksanakan oleh Malaysia berkaitan perkara ini," kata Abdullah.

Menurut beliau, Perdana Menteri juga menyatakan bahawa Malaysia bersedia memberi latihan kepada para pegawai awam Sri Lanka seperti yang diminta oleh negara itu yang sedang berusaha melaksanakan reformasi pentadbiran awam.

Abdullah berkata Sri Lanka berminat menimba pengalaman Malaysia yang telahpun berjaya mengadakan reformasi pentadbiran awam.

"Mereka berharap kerajaan Malaysia dapat menerima beberapa pegawai yang akan dihantar ke Malaysia untuk mengikuti latihan-latihan tertentu atau yang datang untuk lawatan sambil kerja," katanya.

Abdullah berkata kedua-dua pemimpin bersetuju agar hubungan Malaysia-Sri Lanka dipertingkatkan dengan, antara lain, memperluaskan kerjasama dalam bidang ekonomi, pelaburan, latihan dan teknologi maklumat.

-- BERNAMA

AZZ SIA